

求恕齋
叢書

雪橋詩話

九

雪橋詩話卷第九

遼陽楊鍾義撰集

吳興劉承幹參校

法梧門詩龕論畫詩朱山人鶴年顧處士鶴慶笄孝廉
立樞朱山人本吳翰林孫宋孝廉葆淳夢禪居士瑛寶
羅山人聘江侍御德量達齋撫軍玉德馬侍御履泰王
山人霖吳孝廉烜關學士槐萬明經上漣曹指揮銳周
山人淦倪山人璩王山人州元石谷孫蔡主事本俊張山
人賜甯潘縣尉大琨吳處士文徵盛中翰愔大繆處士
頌高山人玉階黃上舍恩長余學士集黃刺史易蔣學

正和王孝廉學浩陳進士詩庭王處士靖邵秀才聖藝
凡四十家人各系詩三韻續論畫詩錢大令維喬陳太
守漢馮助教桂芬袁山人沛陳山人嵩皆爲詩龕作圖
者顧鶴慶號弼菴字子餘以畫柳得名梧門題畫詩有
云南田筆法參倪迂畫師近復稱三朱野雲素人青立蒼古當
推夢禪老盛甫秋馬藥張船王春波筆都好夢禪拜都氏古
北口提督布蘭泰孫文勤公永貴長子以筆帖式外用
知縣三十解組時文勤方秉政同懷弟伊江阿靜亭亦
由樞祕巡撫山東簪裾赫奕夢禪獨泊然自安老屋數
閒冬一裘夏一葛蔬食飲水游情物外性喜畫尤善運

指同時且園凱亭外無與比者與劉文清爲文字交劉
書夢畫每每合作得者以爲瓊寶年七十餘以布衣終
鐵梅翁題照句云偶然拈筆稱詞客是處隨緣作畫師
玉山草堂題其春山采藥圖云龐公採藥未曾還時有
人來爲掩關盡日小窗閒雨到朮花松子徧春山題其
春山訪友圖云沙淨無泥雪半消又尋仙跡度溪橋苔
煙屈曲迷無路處處香生筆撥苗

法時帆自幼嗣其伯父圓明園庫掌和順嗣母韓太淑
人靜存先生錦之女高文定公之自出十三通經史喜
讀宋五子書時帆七歲教識字誦陶詩祖平安官員外

郎以乾隆十九年罷官家業中落移居海淀梧門九歲
庫掌捐館無力延師韓太淑人以教讀自任稍長條誠
甚密應試詩文必手爲評隲中年喜靜坐自號端靜閒
人三十九年春患肺疾以積勞不起喜爲詩不自收拾
所存者雁字七律詩三十首詠益松七言絕句一首彭
文勤題雁字詩卷云女士談經世所稀偶憑賦物託淵
微雲霄一羽宜高格孔雀東南烏鵲飛排連卅首一行
行斷續雲箋籟抑揚忽聽失羣孤雁喞寥天拍水月如
霜荻枯燈炮表阡時教子今爲天下師口授不忘圖摘
句零縑碎錦幾絢絲容臺雅愛採風官

謂洽亭
宗伯

況是登

堂兄弟歡好向管彤標首善八旗詩作二南看夢禪居士爲作雪窗課讀圖何道生題籤冊內題詠者爲王惕甫玉闈峰英煦齋張亥白張船山洪桐生魏春松吳蘭雪吳少甫樹汪劍潭諸人藏伯熙祭酒所戊戌六月出以見示圖有蔣仲猷印記仲猷湘帆老人孫存素堂集所稱最峰學正也亦工畫疑此圖爲最峰作蓋爲時帆作圖者非止一本夢禪作者題跋在而圖亡裝褫者遂羈以蔣作曾以質之伯熙伯熙謂夢禪他畫與此筆意相同疑不能明也

同時出觀者有茂承宗伯嵩壽爲佟景葦所作野園圖

彭芝庭沈塙士錢香樹裘叔度董東山鄂虛亭雙有亭
薩魯望塞曉亭德定圃何翰儒張姓嵐諸公題詠甚夥
東山用是達也非聞也二印曉亭有芳草王孫印舊爲
李寄雲侍御恩慶所藏細字跋尾考景葦侍郎事蹟頗
悉用廉吏之子小印時帆有野園詩爲鏡溪明善作鏡
溪景葦後人也茂承宗伯號雲依爲希文簡曾孫以乙
亥卒於官錢捧石拜座主世襲子少宗伯赫塞里公墓
詩云行帳逢秋塞書堂酌雪林三年鄰住近一第受知
深講讀承皇嗣賡颺體聖心益堅儒者守何啻重南金
迴望寒空景沈思大壑流假歸纔一歲生別竟千秋奉

母中難想貽孫稚且憂元堂號不徹僵木爲颺颺宗伯
所居曰以約堂典蔣琴川相國藜光橋賜第之半雍正
十三年以侍讀入直尙書房乾隆十四年以禮部侍郎
再入直與景荈侍郎交最契有和景荈以約堂卽事詩
其題畫詩云寒臯度虛籟遠樹接山根一縷炊煙盡歸
雲帶溼痕澹士家風此其繼別

偶武孟官荆門州吏目晚年以目微眇自號瞎牛翁有
江雨軒集朱錫鬯謂所選元詩獨開生面而以缺七言
絕句爲憾法梧門按文淵閣四庫書時閱元人詩佳者
輒錄存多四朝詩選元文類宋元詩會元詩體要元風

雅元詩選元詩癸集所未載見所撰陶廬雜錄

凡六卷
陳笠帆

中丞所刻

今備錄於左齊已所謂乾坤有清氣散入詩人脾

者庶乎近之艾性夫春溪云晚溪晴穩麥風斜橋影傾
敬水見沙十里荒陂自春色一雙鴻鴻唳楊花雨香雲
嫩散春泥細草初肥綠滿溪無數落花鶯背上避人都
入柳陰啼僧閣云蘆竹叢高舊石闌菩提香遠出林端
雁聲忽斷梧桐雨草閣秋深倚暮寒張觀光聞角云誰
送寒聲入夢中遙知人在戍樓東明朝梅嶺花飛雪未
必都因昨夜風江景云寒生雁背天將雪冷入魚腮水
欲冰釣艇歸來江欲暝舟人分火點漁燈王奕過江云

玉勒金臺逐去塵十年多少渡江民中流試叩金山老
曾有深衣過魯人楊宏道迎祥觀卽事云牽牛延蔓覆
檐青涼氣著人如酒醒天外晚風收積雨石爐燈火白
泠泠尹廷高江鄉夜興云極浦霜清雁打圍漁燈明滅
水煙微天寒想是鱸魚少犬吠空江船夜歸釋大訢題
孤嶼圖云澹煙疏樹月朦朧路隔寒潮斷復通添箇茅
菴分住我明年飛錫海門東侯充中泮梁郊行云大梁
城下草連雲千古河山對夕曛一掬賈生憂國淚西風
吹上信陵墳劉鷲九日峽江舟中云秋風如此客辭家
重理平生舊帽紗不是故山無白酒年年奔走負黃花

宋无山中云半嶺松聲樵客分一溪春草鹿成羣採芝
人入翠微去丹竈石壇空白雲詠蘭云分向湘山伴野
蒿偶并青草入離騷清名梅出羣芳上不入離騷更自
高洪焱祖中秋宿貴義嶺無月云亂山深處過中秋只
有風湍泊石頭賴是今宵無月色若令月出轉添愁唐
元皆春亭云自家意思窗前草滿目紅酣川上花十二
闌干風雨霽有人來此岸烏紗李存贈賣楮士云門前
柿葉未堪書窗外芭蕉雨後疏正恨新詩沒題處故人
攜紙過庭除朱晞顏自題云乘興風波萬里游清如玉
子泛扁舟早知鯨背推敲險悔不來時卽跨牛周伯琦

夜坐偶成云清夜巖城玉漏遲杏花疏影散書帷紅塵
不到揚雄宅石鼎焚香讀楚辭納新京城春日云官牘
冰消綠漫隄落花流水五門西黃鸝不管春深淺飛入
南城樹上啼張仲聲壁上小景云半林斜日帶晴霞彷彿
柴桑處士家千里田園歸未得只疑此地有黃花陳
鑑道經東崖砦云荒村寂寞兩三家故壘東邊石徑斜
巖樹不知人死盡春來還發舊時花李繼本對月同宗
兄賦云窗裏娟娟納月光牀頭願影轉淒涼束書幾日
還山去露坐彈琴秋樹旁沈夢麟湧金門卽事云湧金
門外步陽春舊日軒楹盡劫塵卻笑柳州新燕子飛來

不識白頭人同怨歸權云衝煙去卽比鄰

闕

載月歸時

老稚迎魚少水多生事了一溪晴碧有誰爭張仲深溪
上云溪南溪北燕交飛溪上人家客未歸翠壁夜聞山
鳥叫金爐燼落水沈微趙文展亦周墓云竹刺藤梢未
易攀一椀紅酒酌荒菅攜兒不敢高聲哭僧錄新來住
此山王沂看山云昔年騎馬看青山曾與青山共往還
今日君家亭子上依然山在白雲閒過潼關云天風吹
袖下雲臺玉井芙蓉爲我開行過潼關卻回望半空飛
翠逐人來程端禮閒步云城上寒梅白雪花城邊嫩柳
黃金芽平林望盡意不盡回首城西日欲斜胡行簡青

山白雲云憶從扈從過居庸北望迢迢萬玉峰獨恨崑
崙猶未識至今長被白雲封陳宜甫老農云老農村裏
別無營飽飯惟知樂太平天子駕來應不顧低頭鞭犢
自春耕陸文奎早春云草色青青沒燒痕山川滿目酒
盈樽只愁逋客還家日先被春風緊閉門次伯璣云梅
花風雨一江寒失卻灘頭舊釣竿自著漁簑沽酒去路
逢賈客問長安胡祇遹玉堂偶成云瓠觚蔬圃雨餘香
林影蟬聲午夢涼一日閒情如兩日閱書終日未殘陽
張之翰聞雁云燕中五見雁南下今歲雁來余始還堪
笑餘生不如雁雁歸常在一年閒宿柯亭云好山似恨

客西行便比朝來減舊青我自笑余忙箇甚滿船風雨
宿柯亭王旭雜詩云東流江水不西還六代興亡一夢
閒行客有懷誰會得鳳凰臺上看東山南湖雨中云氣
涵雲外草堂虛蘋末風來午夢餘起逐鄰家上船去藕
花深處看叉魚三年身不到江湖慚愧煙波舊釣徒今
日扁舟復何處臥聽風雨鬧黃蘆荷葉青青水溼衣南
湖日暮採蓮歸菱歌一曲風生蒲幾處衝煙白鳥飛有
懷云春風花落紫藤枝正是山蔬可擷時惆悵故園歸
未得興來空詠采薇詩晚步云草沒行蹤一徑斜西風
開滿蒺藜花行歌曳杖不知遠轉過青林又幾家宋禧

題畫云松林日落碧雲開野老溪頭坐石苔隔岸好山
招不到一篙流水待誰來滕安上村居云幽居一日勝
兩日故友十人無五人村北柳陰餘敵大肯來盤礴樂
閒身王結次韻云折得寒桃雨後花自憐白髮照烏紗
陌頭楊柳撩春思掩映茅亭賣酒家耶律鑄贈人云不
知何事傷游子漫折閒花盡日吟轉覺忘機是啼鳥靜
依芳草說春心

小尹太常伊湯安號耐圃拜都氏乾隆辛卯舉人能文
好古性情雅澹尤篤於師友之誼其鄉試實出施鐵如
太僕之門爲刻遺集守嘉興時頗著政蹟輯郡志八十

卷阮文達稱其有三善文達按試吳興成秋桑七律江
浙和者數十家耐圃詩云秋老桑畦落葉填野人籬落
興悠然雞鳴隔巷生涼意鴉亂疏林淡夕煙陌上風高
懷靜女隆中樹古想名賢祝他比戶皆輕暖繪入幽詩
第幾篇花間戴勝記新陰啼鴉聲中思不禁賸有風林
掃茅屋尙留霜葉趁楓林明年春繭須如甕薄暮秋胡
愛贈金好待樹頭紅甚熱勸農時節重相尋校經贖感
舊仿少陵八哀作有浙水名郡守自昔稱三賢流風數
百載維公堪比肩之句三賢者明陽城楊貞肅公繼宗
賈溪徐公盈進賢何公社也

練川十二子如諸澱淪廷槐汪綉青照王鶴溪鳴韶俱
以諸生終惟錢禹美塘乾隆庚子通籍官江甯教授著
有律呂古義史記三書釋疑淮南天文訓補注漑亭述
古錄鶴原詩草綉青著有三家詩義證大戴禮注補嘉
慶甲子金堅齋錢同人及其甥徐魯壇爲之募刻澱淪
嘗爲綉青作陶春館印譜歌云六書久蕪小學廢眞行
草隸徒紛紛相斯史籀不可作金翦玉筋誰窮論莽新
變制及文字秦章漢印如絲棼陽冰轉注得天授指斥
叔重苦未醇楚金兄弟拚羣雅別裁僞體眞斷斷宣和
天子盛文物敦貞鬲甗彝舟尊歛識亦足徵蚪篆流傳

不辨僞與真情哉搜羅富章印著譜垂世初無聞宋元
諸人逞妍媚王顏姜晁同等倫天水王孫最後出妙處
獨遡周兼秦同時好手有吾衍垂金屈玉何紛綸風流
未沫及明代絕藝獨數三橋文歸蘇宋王各樹幟檀園
一老世共尊本朝名家不可數鶴田雲美雙嶙峋其餘
程沈并徐許各各造詣咸空羣年來好事頗中絕金石
著錄無其人知君嗜好與俗異鷗波海岳不足云明窗
淨几森羅列銅斑玉血光磷磷建饒之瓷青田石碑磔
琥珀雙鳥銀其鈕橐瓦及亭索辟邪師子悉綜甄周官
璽節漢斗檢大篆小篆形模分千年土花蝕不盡波磔

鈎畫微帶皴字奇形古粹未辨以指劃肚空吟呻印以
硃砂紙用蠶不令過眼同煙雲傳之奕世永寶惜明誠
永叔同千春鶴溪所居堂曰逸野旁闢一室懸篋笠以
見志嘗自作篋笠軒圖

上方山多黃精土人常製以餉客亦多杏四方爭售之
摘星陀爲上方最高處石梯千仞必攀鐵鎖而上雲水
洞深三里許必然炬以行有一百八景各肖人物徐文
長有游雲水洞記一斗泉相傳爲華嚴所穿有寺依絕
壁僧卽於懸巖下供佛孔水洞上有寺名萬佛堂石壁
刻佛像皆寸許有開元間投龍壁石刻山北去三十里

有紅螺巖絕勝先高祖游上方山句云雲梯有路天應
近蓬島無人晝更長汪蒼巖宿兜率寺作云蛇盤數紆
曲猿攀幾喘息僧窗四面山白雲常在席名藍七十二
樓臺皆歷歷鐵冶亭上方山紀游句云石如拒客頻當
路花欲逃名半隱巖伯熙表兄同鄭東甫錫聘之游上
方山云金風瑟瑟酒波涼挈榼攀雲出上方料是人生
難得再黃花嶺北過重陽黃花嶺極險峻上下廿餘里
從老虎峪轉上皆碎石苔滑不可行嶺上菊種甚蕃五
色備具但比盆種者少小耳

曹秋岳製研詩爾唐官務久凋零海國重來倚玉屏冶

亭冢宰藏有歐陽公南唐歙石硯公自記云此硯用之
二十年矣當南唐有國時於歙州造研務選工之善者
命以九品之服月有俸廩之給號研務官歲爲官造研
有數其研方而平淺者官硯也其石尤精製作亦不類
今工之侈窳此研得自今王舍人原叔原叔家不知爲
佳研也兒子輩棄置之予初得之亦不知爲南唐物有
江南人年老者見之悽然曰此故國之物也因具道其
所以然遂始寶惜之其謫夷陵也折其一角皇祐三年
辛卯龍圖閣直學士歐陽修記治亭及弟闔峰均有詩
治亭家舊譜姓覺羅氏後改棟鄂蓋覺羅爲彼時尊稱

非與天潢同派也治亭生本將門以進士起家颺歷中外
欲然不自滿儒生學子聯茵接襪揚推文字不異老
寒士論詩貴氣體深厚貴實境不貴虛詞論書云豐者
無骨瘦者少腴尙氣魄者失怒張矜風韻者趨柔媚皆
非正格督兩江時以失察屬邑冒振謫戍烏魯木齊其
徠甯雜詩注云同人經師謂之阿渾每日申酉時誦經
擊鼓謂之送日收穫後放水入田謂之澆冬於九月把
齋至十月初望見新月過年七日一市謂之把雜爾築
土正方四面環水密植榆柳以爲憩息之所謂之柏斯

塘

梅翁與弟閻峰侍郎最友愛連裾芸閣分鱸蓬池職並
清華飲耽文字閻峰詩文曰蘿月軒存彙凡八卷翁覃
溪序云吾里自燕山十家詩派以古勁見格調而近日
言詩者若閻峰少宰獨以和雅之音兼而有之閻峰之
詩其體源於其兄治亭而加以深細之思清逸之氣猶
憶君兄弟及甘道淵其論詩索予題其連牀對雨卷雖
意在眉山而心之精微商榷深造處於讀杜爲多及予
與君同官閣學與述菴司寇玉亭宮詹扈從薊門道中
嘗五更山行君與予及述菴聯騎疏林星月中拈韻屬
和謂不減虞袁馬三人槍竿嶺馬上作也梅菴詩鈔哭

第四首之三云莫憶聯牀日空餘對雨圖弟兄雙淚絕
天壤一身孤遺稿傳心語殘書半手摹不堪搜篋笥病
眼久模糊尋詩之夢春草已非對牀之談秋雨欲歇其
愴念者深矣蘿月軒詩如宿龍泉菴云松濤沈夜氣雲
碓響空溪登寶珠洞最高閣云客襟承落葉樵背荷秋
煙皆饒逸致方望溪嘗在浴德堂訂三禮及四書文閣
峰有浴德堂恭錄欽定詩經樂譜全書偶成長句呈朱
爰亭前輩詩供奉南齋時作也閩峰時泉閣學輓詞注
云先生奉命往浙祭告山瀆歸途卒于泰安年四十七
歲定例旗人丁憂過百日卽任事惟服中不陞遷先生

爲少司成時丁母夫人憂告病廬墓三年案時泉名圖
敏他塔刺氏乾隆壬辰翰林其早發正定詩云浪翻滹
水濶雪擁太行高興象殊爲雄渾

孫季述詩以五言往體爲勝如宿元符宮云靜覺鼠齧
松微聞鳥梳翎林空虎氣逼草滑蛇涎腥山頭白濛濛
寒氣生夜明入蓬壺洞云垂乳甘可餐流膏滑難觸心
疑轉仙徑曠蕩見平陸居氓雜羲皇村舍散花竹憩鬱
岡云蕉心冷逾碧茗味苦還美星鐙禮金仙雷火合石
理常尉邱庶子猶覺去人未遠至李斯泰山石刻題後
云法家尙刻削此跡何眞涓試讀逐客書後愚而先賢

觀其違時屯變本亦可憐數語可抵姬川先生一篇李
斯論

洪北江以上書三府遣戍伊犁出獄將行無所得資果
亭尙書成格時官戶部主事貧甚又雅未識北江聞其
無資用以屋券質銀三百兩盡餽之乃就道北江在戍
所僅百日特旨賜環歸自號更生居士嘗繪游歷圖十
六幅末學圃種梅二幅在伊犁時事也其天山客話云
伊犁桑椹極佳長者至寸許余嘗飽啖之據土人云尙
不及葉爾羌諸處所產者然已遠過於內地也伊犁白
菜極脆美自三月至冬十月皆可以爲常饌伊犁河魚

極多類皆無鱗而皮厚數寸雖欲烹鮮殊難下箸綬定
河出墨花魚較美伊犁所產稻籽極大但悉資雪水澆
灌性甚寒阜雕兩翼皆大如車輪慣欺獨客手中物亦
能攫之四月中花事極盛土人統名果子花顏色頗似
海棠伊犁雉兔並佳而雉尤美冬日以此爲上味產烏
魯木齊及奇臺者亦相倣塞外百菜皆極甘美甘涼等
州縣所不如也塞外春燕皆巢于土室中或棲止廚屋
故余紀事詩云只有塞垣春燕苦一生不及見雕梁塞
外馬冬夏皆食青稞故壯佼有力其曉讀書齋雜錄云
哈密瓜卽古敦煌瓜也漢書地理志注杜林以爲古瓜

州地生美瓜小顏引舊注云卽春秋左氏傳所云允姓之姦居於瓜州者也其地今猶出大瓜長者瓜入瓜中食之首尾不出徐堅引廣志云凡瓜之所出以遼東廬江敦煌之種爲美瓜州大瓜如斛御瓜也然唐書地理志沙州瓜州等皆不貢瓜或以其生脆難致故不入常貢耳敦煌瓜亦有二種皮薄而輒者出哈密回城等處大者如枕瓜熟時到口卽消融無滓其貢御者乃係未熟時生摘至熟則不能經久且不能歷遠道耳一種皮厚而脆者嘉峪關以內至甘涼一帶皆有之大者如斛食時須削去其皮其美亦不減哈密等處所出地理志

注所云狐入瓜中首尾不出者蓋指此種耳唐書地理志北庭大都護府貢阿魏今巴里坤烏魯木齊一帶皆有土人亦呼爲押不盧價亦昂雪蛆則天山在在皆有之

吳愬甫蔚光號兼山爲昭文故相介弟少與黃仲則高東井楊才叔汪劒潭齊名庚子登第選庶常改禮部主事以病假歸愛郭西湖田幽曠自署湖田外史有湖田詞隱橫卷又有湖田書屋圖姚稽傳題云中田有精舍挾策青林閒起見海東月流光湖上山時聞漁者唱或值耦耕閒非得忘機侶翛然自掩關昔君辭省閣余亦

臥江濱山綠垂湖岸宜容澹蕩人藏書多足老資物少
無貧更欲刺舟往相從忘主賓有素修堂集小湖田樂
府詩如蕙來綠酒堪爲國畫出青山可當家意度亦極
超越女士席佩蘭題其詞集云秋燈願擘紅蠶繭親繡
曹娥八字評退閒二十餘年有翛然遺世之思蒔花藝
竹淪茗滌硯不藉手於僮僕好佳山水杖履優游以圖
書琴鼎自隨至亭榭潔淨手自播拂嘗購王冕梅花長
卷以梅花一卷名其讀書小樓嘉慶八年卒年六十一
馬秋藥太常序未谷詩集謂未谷爲詩嬾不收拾大半
多酒後唱和之作方其酣適之時棗壺在前朋尊在後

敏銅鉢以誇捷詠冰車而鬥新取雋一時甯復計身後
名哉又下筆特工八法往往脫手輒爲人持去比醒都
不復記憶其平日論詩多拘忌或某字未愜某對未工
徐思涂乙旋就遺忘故未谷之詩之散佚也其病有四
癩一也醉二也工書三也論詩多拘忌四也其病根有
一蓋自有可以不朽無意於爲詩而已伯熙下世後爲
輯詩詞僅得四卷平昔所見甚夥無從收拾秋藥此言
不啻我意中語未谷詩凡四卷曰東萊草曰老落賸稿
曰行笈草曰南征草西廊云疏簾清簟罷談某日轉西
廊客到遲一枕風涼初睡起刺桐花落雨來時題畫云

連朝風雨臥荒村左手持螯右引尊不典衣裳不賒米
催租吏到莫開門幽靜澄迴讀之可以析煩蠲垢

張平子思元賦御六藝之珍駕莊棣琛取以名其讀書
之室其題宋景文集謂景文詩落花風觀閣睡鳴雨池
塘得少陵晚節詩律景文固崑體然勝處與山谷精詣
相角非西江餘子所及也珍藝宦詩鈔如細添瓶水扶
花妥深貯爐香約火微飢鳥繞樹非關月落葉辭枝不
待風亦皆雅音棣琛宗伯存與子也

同母之字謂之雙聲同部之字謂之疊韻杜何將軍山
林詩卑枝低結子接葉暗巢鶯卑枝接葉是疊韻贈鮮

于京兆奮飛超等級容易失沈淪奮飛容易是雙聲送
鄭司戶虔云蒼惶已就長塗往邂逅無端出餞遲蒼惶
爲疊韻邂逅爲雙聲王西莊謂大凡摹擬情事景物一
字不能盡則疊字以形容之雖鳩之關關葛覃之萋萋
是也或用疊韻則山之崔嵬馬之虺隤是也或用雙聲
登高曰高岡馬曰元黃是也蘇子瞻口喫詩純用雙聲
佶屈可笑若於穩順聲勢中忽屢以二字使齒舌擊觸
因澀得平遲其聲以媚之此律詩妙境也盧紹弓謂詩
言志歌永言聲依永律和聲三百首篇窈窕爲疊韻之
差爲雙聲其他不勝枚舉蓋上古人人皆明之錢竹汀

之言曰軒轅栗陸以紀號皋陶厖降以命名股肱叢脞
虞廷之賡歌也昆侖滄浪禹貢之敷土也童蒙盤桓文
王之演易也瞻天象則有蠨螋辟歷辨土性則有甌婁
汗邪宣尼刪詩斯理彌顯伊威蠨蛸叮嚀熠燿則數句
相聯崔嵬虺隤高岡元黃則隔章遙對詩三百篇聲韻
之至善者也魏世儒者初爲翻切六朝人好言雙聲疊
韻故其詩文鏗鏘流美異於儵楚之音杜子美聖於詩
其自言曰老去漸於詩律細不徒得三百篇之性情并
三百篇之聲韻而畢肖之組織纏繚自然成章良工之
用心通於天籟此之謂律細也何邕瞻評李義山詩凡

句中雙聲皆一一標舉之并有隔一字兩字而遙應者
海甯周芑兮著杜詩雙聲疊韻譜朱梓廬爲其宗弟子
鴻作杜律雙聲疊韻表引云試舉唐人詩無不合者蓋
自永明以來至於沈宋約句準篇迴忌聲病以爲律詩
唐人相傳皆知其法老杜詩乃無一句一字放過元微
之推重杜詩排比聲韻雖太白不能歷其藩翰者正謂
此其題杜律表三首云窈窕參差聲自然爲絺爲綌疊
雙連誰知永明祕器藏都在葩經三百篇飯顛山頭太
瘦生詩成自改慘經營桃花細逐楊花落一字吟安字
字平十字之文顛倒配天衣無縫錦機新鴛鴦繡出分

明在漫說金鍼不度人

沈休文云十字之文顛倒相配字不過十巧歷已不能盡何況

復過於此者乎十字謂五言詩也若七言詩增至十四字其變更難窮矣原注王萊友有毛詩

雙聲疊韻說一卷尤爲詳晰其謂字無假借不可以成

文苟非雙聲疊韻無以成爲假借亦通論也至其引梓

澤邱墟爲李太白文則爲誤記鄧嶰筠尙書亦有詩雙

聲疊韻譜其目曰錯綜對待彙句單辭

宋蒙泉弼嘗輯德州志稿已復網羅舊事掇拾軼聞得

百數十條命曰州乘餘聞紀文達謂似臨川世說爲題

二絕云六朝小史豔縑緗蕭綺王嘉總擅場獨與臨川

傳世說可憐劉峻在齊梁檢點生平記事珠丹鉛一字

幾躊躇何人復作裴郎學一笑黃公舊酒壚其記李司
寇濤在館甚習國書後爲浙中監司撫藩將擾鹽務司
寇持不聽一日撫作國語屬藩曰事可徑行計須爾爾
勿關僉父事司寇俯而笑撫遽悟掩面語曰渠是清宇
翰林田司農第南宮不殿試極力學書覲得館選卒不
與終身恨之恆見篇章一聯云此事亦尋常於我偏無
分又題飛卿集云不將詞賦陪雕輦虛讀南華第二篇
雖安石碎金亦可見前輩風趣若孟隱君生平不涉錢
刀事人問之曰善賈者類忍放利者多怨孫通議勦使
黔過洞庭阻風三日俄而風正連舟並帆駛於命馬乃

語子布曰文端相國

張英

有言儒者當知待字之味今之

風非以待得之耶然能爲待者欲能爲備帆檣不修篙
櫓不理是自尼爾故曰君子藏器於身待時而動已則
無具歎老嗟卑是之謂不知務可作儒門法語觀不僅
有資談助也

羅尺木履先句云馬磨當戶樹犬吠看碑人萬光泰柘
坡句云古樹烏巢密疏寮客到稀符之恆聖幾句云寒
煙棲木末活水齧城根余光治午亭句云沙橫半溪雪
人語隔林鐙毛國翰青垣句云巖花留雨色風絮落春
陰僧霽山句云微雲無礙月細雨不傷萍皆可右拍郊

肩左挹島袖

吳樵石名嗣廣字芑君居峽石嘗以詩受知於~~初~~初白
有樵石詩稿其宛陵集評本云宛陵先生謂作詩須寫
難言之景如在目前含不盡之意見于言外讀其集方
知此語實先生自道所得也敬業師語余宛陵正是突
過摩詰又云宛陵仍是唐音非宋調也阮亭詩話作詩
曰典曰遠曰諧典諧易得遠字惟蘇州及宛陵到之此
評爲真知宛陵近人多學梅詩苦不得其遠韻正李百
岳所謂無端卻值歐陽九彊被牽句作孟郊者也

楊西禾倫詩講格律撰有杜詩鏡銓其生平師法所在

也過周家水亭云閒花多落澗細雨欲沈山嘗主湖北
江漢書院江西白鹿洞講席揀發廣西官荔浦知縣三
爲同考鄉官得士多知名於時

石綠餅明供御物也徑二寸厚四分面文曰龍香御墨
背曰大明隆慶年製皆正書輪旁朱篆重三兩八錢五
字乾隆壬子吳念湖司馬得之桂未谷處錢唐吳昇秋
漁時客涕南賦詩云鸚鵡山南白雲子銅精熏作翡翠
羽芙蓉擣汁麝屑膠大白深凹三萬杵承平天子慕開
元龍香新劑翻松丸祖母綠裁圓鏡樣亞姑青印小茶
團龍寶十二埋塵下冷翠猶磨銅雀瓦柿葉書成伴廣

文楊枝買後隨司馬相逢爲出豹皮囊古壁一規寒放
光賈胡欲攫眼空碧上品只許收元霜雙螭蟠面金塗
字外內朱文鈔歛識年號分明銖兩真內家製造精無
二梅花祕閣珊瑚匙想見薇香滴露時不是宮方修綠
黛肯教梳匣襯紅菽三百年來離畫筆一朝月魄飛蒼
色從今說餅亦充飢何須邽字珍唐墨秋漁領癸卯鄉
薦大挑一等補四川中江縣擢知府有小羅浮山館詩
鈔十五卷仲雲尙書尊人也

歟凌次仲慕其鄉愼修東原兩先生之學與阮芸臺爲
至交初見卽擬大鵬見希有鳥賦以見志庚戌成進士

例授知縣自改教授曰必如此吾乃可養母治經朱石
君用昌黎薦士詩韻題其校禮圖有君才富江戴及遠
利就冷官之句本朝講攷據者三禮六書駸駸復古樂
爲六藝之一而通此學者絕少都四德秋莊撰有黃鍾
通韻二卷凡十四篇多本於蔡氏律呂新書而增益以
己意次仲著燕樂考原由今樂通古樂爲陳蘭浦聲律
通考所自出特加詳核耳其詞集名梅邊吹笛譜摸魚
兒雨後江上晚眺云暮天空乍收涼雨隔江飛過清冷
煙鬟綽約山容潔埽得兩蛾幽靚無限景縱倩取鏤冰
琢雪應難詠斜陽未暝見別浦殘荷迴汀折蓼都作澹

紅影江光遠蹙起鞞紋萬頃微風卻好初定盈盈十五
吳娃小笑與碧波相映嬌妒性有意要驚他沙上鴛鴦
醒翠裙半整便急打蘭橈雲明擊碎搖過采菱艇阮芸
臺過海州板浦弔次仲教授句云因文明禮樂本孝礪
廉隅

自趙州而南行五里過大石橋唐張彧石橋記刻石無
存惟存明嘉靖閒刻石又十五里古廟口金山寺外有
茶亭阮芸臺題句云買絲客去休澆酒餽餅人來且喫
茶

趙忠毅公鐵如意當時所製非一銘詞形製大略相同

而年欵各異施念曾宛雅所載一柄爲神宗戊申春製其最古者也銘曰其鉤無鏃廉而不斲曰歌曰舞曰弗若是利維君子之器也厲樊榭韓其武沈歸愚所歌皆未識年月若壬申製者則在初頤園處天啟壬戌張鼇春製者在吾簣一處天啟癸亥製者在陸丹叔處成邸所得爲天啟甲子所製詒晉齋句云銘辭二十有八字義類直與丹書同阮文達應教作云趙公老死不如意公如如意國不墜逆璫鑄錯滿六州三尺寒鏐天所棄公引正士盈朝廷在地爲岳天爲星小人倒竊君子柄二十六字空鏝銘我讀此銘重太息銀篆消磨鐵花蝕

指揮曾見三君來抨擊能教四凶陪嗚呼此器鉤無錢
廉而不剝古所稀天鑿搜羅出呈秀措紳點竄歸廣微
嗚呼此器以歌舞中外忻忻望政府清流終勒東林碑
戍骨幾埋代州土嗚呼此器以弗折百鍊精剛正臣節
一握難收婦豎權六人甘死銀鐙鐵公銘天啟甲子年
是年十月公南遷五更一星對殘月石硯與此同清堅
忠毅東方未明之硯銘曰殘月暉暉太白睽睽雞三號
更五點此時拜疏擊大奄事成策汝功否則同汝貶
天不佑明使公貶公貶乃將縱大奄摩挲金氣動星文
太白歸天夜睽睽戍申之銘作以弗是利利與剝器爲
韻餘者作折文達謂或篆文相近摹仿之譌或讀是字

絕句則折字與下不屬

阮文達題宋高宗瑞應圖云康王天命爲元帥先使臣
民應符瑞南渡須收奉璽心北盟早議投鞭志緋帶蕭
郎待詔才江山半壁手中開卻將希古滄浪法勅寫中
興瑞應來上河曾記清明日鄭俠監門傳諫筆漫說東
京天水流竟看艮岳宮車出此日惟知崔府君小奴先
見護行人兩河將相占了甲百萬蒼生繫鬼神鬼神拯
馬河堅凍白兔仙亭偶然中冰天何處走青衣御營已
協黃袍夢夢中江海半模糊泥馬金牛事有無卻聞風
藥花錫使歸寫吳山立馬圖此圖絕勝延祥觀半臂雙

鑲莫同玩回憶黃襪擲將時祇今道服扶圖看臨平燈
火似樊樓賸水殘山屬馬劉圖中尙是中原地半是磁
州半鄆州李宗韓岳皆思戰願飲黃龍恢赤縣此事當
年最吉祥淩煙惜未開生面赤符龍鬥渡滹沱自古中
興瑞應多白水真人眞謹厚惟聞苦戰不聞和按大內
所藏蕭照畫瑞應圖一卷凡十二段第一段記顯仁在
北時徽宗問康邸祥異奏曰上初誕育金光耀室四聖
從行非他兒比二段記顯仁夢神告曰勿以殘物食上
戒之甚至三聖記帝喜親騎射兩臂舉斛米行數百步
四段記肅王代往金營求成五段記使金時顯仁懿節

送至廳事小女奴招兒指曰有四人甚長大執兵器從
王馬後顯仁曰吾事四聖謹必獲保佑六段記磁州郡
民殺金使王雲第七段記顯仁嘗以象棋黃羅裏將子
書康王字焚香祝曰若擲子在盤惟康王字入九宮者
必得大位擲下果如祝他子皆不入亟奏徽宗大悅八
段記帝猶駐磁而敵騎至郡東問路傍老婦帝在磁否
曰前日已過山東敵乃退舍九段記帝經鄆州館於州
治圃有飛仙臺帝密有所卜命箭連中榜上三字十段
言駐磁州晨出郊騎軍從行忽白兔躍起帝彎弓一發
中之十一段記帝自磁州北回經李固渡扈從馬先過

帝殿其後惟高公海從行帝纔及岸冰裂公海馬陷僅免十二段記帝受命爲大元帥夜夢欽宗脫御袍以衣之辭避之際遂寤厲太鴻亦有蕭照中興瑞應圖詩詒晉齋集考之最詳

袁簡齋詩毘陵星象聚文昌洪顧孫楊各擅場顧謂無錫顧立方楊謂金匱楊才叔才叔以拔貢生試令甘肅補伏羌值田五之變田五者回民之譎驚者也聚石峰堡以復新教惑眾作亂伏羌當秦隴之衝賊至攫城守禦者四晝夜事平擢靈州知州兄容光同在圍城有秋燕詞云者番門巷認烏衣爲語舊時伴侶莫西飛才叔

自著伏羌紀事詩一卷弟荔裳由中書從征廓爾喀遇
於靈州逾年晉甘肅布政才叔例引避入貲爲戶部員
外郎荔裳旋調蜀藩才叔有初八夜月記去年與荔裳
在高平話別時用前韻卻寄百字令云去年今夕正半
輪皓魄空桐山上偏照離人催部曲一派旌旗搖漾聞
道傳烽急郵飛羽笳鼓連天響良辰三五可憐孤負清
賞轉眼又是經年燕山蜀棧各有天涯想料得高堂應
念我對月嬾傾家釀暈未全銷圓猶有待夢怯巴江浪
謝家詩句吟成誰和高唱時教匪方渡潼河焚掠三臺
中江縣境成都戒嚴故有暈未全消及夢怯巴江之句

荔裳卒于蜀太夫人繼逝南歸無以自給之秦主講關
中又之蜀修四川通志嘉慶乙亥卒于季弟蘿裳安縣
署中年六十三

宋于廷洪州別憚子居大令敬云文字居然百不靈閒
官只許住寒廳早愁鍛鍊嵇康獄更恐飄零戴聖經老
母門閭增悵望故人書問好丁甯臨歧別子無多語怕
有山中魍魅聽是年爲嘉慶甲戌子居以瑞金知縣權
南昌府吳城同知爲姦民誣告家人得贖以失察被劾
旣奉部議革職還至瑞金頓首謝鄭孺人曰爲吏不謹
貽太夫人憂鄭孺人笑曰吾知此獄無媿于汝心故不

汝責也且汝好直不能爲非理屈得禍當不止此今以
微罪行幸矣時巡撫金蘭畦先已薨逝阮文達自河南
調撫江西未至布政使方護理印務惜曰憚子居大賢
乃今以賄敗

近世言音韻者以憚子居爲最通其說曰脣齒之差父
不能得之於子宮徵之易君不能強之於臣輕重相承
疾徐相生毫釐之間可以千里況廣之以四海引之以
千古哉是故聖人之作爾雅也廣輪之變曰釋言山河
之隔都鄙之囿是也古今之變曰釋詁歲月之積時代
之遷是也其不變者聖賢所錄方策所傳別之曰釋訓

經語史論以義爲重故無所變焉言韻者以廣取爲宗
用韻者以通時爲大易之韻歸之易詩之韻歸之詩秦
漢之韻歸之秦漢唐宋元明之韻歸之唐宋元明爲絲
爲頌爲箴吾以從乎易焉爲誄爲銘爲四言詩吾以從
乎詩焉爲騷爲賦吾以從乎秦漢焉爲五七言詩吾以
從乎唐宋焉爲詞曲吾以從乎元與明焉

伊墨卿送同年達梅岑檢討奉使西域云涼州西去萬
重山鴻鶴高飛雉子班珥筆詞臣秋出塞囊弓都護夜
臨關風吹白草霜千里天接黃沙月一彎羌管未妨聽
野戍班生三十好容顏梅岑名達林已酉館選後以事

降孔目

歷城郭小華孝廉敏盤桂未谷弟子工詩畫隸書專師
未谷嘗爲阮文達書重修高密鄭公祠碑未谷詩集有
與馬秋藥顏心齋及小華聯句之作

趙味辛雲溪樂府米堆山云米堆山一瓶一鉢空盤桓
靈巖鄧尉悲日暮流涕大呼時事去臘月十二吾將行
青天浩浩鴻冥冥左挈葉菴師右攜藥地僧武進薛案
諧孟承方山之緒餘與馬君常諸人友善南雍官比部
崇禎間守大梁寇張甚所上計憲臣多不能用戊寅冬
寇圍汴城三日黃左諸帥至勉餽給之返郡大呼曰時

事去矣投劾歸甲申後削髮入山二十餘年更名米號
堆山一瓶一鉢蕭然于靈巖元墓間疾革自緇歷日曰
將以臘月十二日行至期而瞑有前後集其祇園圖和
詩十六章園在清涼山圖十六景楊龍友爲無量居士
作也其子守其遺訓閉戶授經不交世事

王鐵夫論書絕句前後三十六首始於頴上黃庭終於
蔣湘帆於古今書人源流揚摧略備其餘詩家多有論
書之作就所記憶筆錄如右吳駿公題歸元恭僧服小
像云中山絕技妙空羣智永傳家在右軍爲寫頭陀新
寺額筆鋒蒸出墨池雲周減齋自跋隸書云誰能隔宿

對黃花度盡重陽更憶家欲換青錢沽雪酒八分小字
寫寒鷓難教去盡外來姿老腕羞慙力不隨方疊出誇
官樣好阿誰能愛邵陽碑史蕉飲書陳子文札尾云點
黼翩翩筆絕倫臨池法已妙通神書成青李來禽帖自
是欽崎磊落人姚惜抱論書五絕句云褻屐風流貴六
朝也由結習未全消古來習氣除教盡別有神龍戲絳
霄筆端神動有天隨汎連淹留兩未知莫道恩恩真不
暇苦將矜意作張芝雄才或避古人鋒真脈相傳便繼
蹤太僕文章宗伯字正如得髓自南宗論書莫取形模
似教外傳方作祖師老去差當捫鼻孔世南臂痛廢書

時本是嶽崎可笑人衰羸今況髮如銀薑芽斂處成何
狀正得嚴家餓隸偷他若翁劉梁王及包慎伯集中諸
作則專家之學不當以詩論也

張文端母始夢有異人自稱王敦至其家生子名敦哥
數歲殞母慟甚夢異人復至曰吾終爲夫人子遂產太
傅名之敦復長遂以爲字袁香亭得子於所失小郎有
再生之徵姚惜抱賀以詩云普門大士感修熏福德兒
童乞細君正似吾鄉張太傅再招東晉大將軍金環桑
穴眞堪信老蚌珠胎倍可欣逸少諸郎他日貴不妨少
者最超羣

張鍋魁秦人鬻麩鍋魁於成都市以業爲名年三十許
爲征金川兵卒負糧赴軍營蠻賊四十餘從箐中突出
劫糧縛眾卒將刃之鍋魁奪賊刀斫賊殆盡解眾縛裨
將聞其事報大將軍呼至帳中詢殺賊狀甚悉將官以
官不肯予之金不受仍歸賣鍋魁成都市中崇甯米生
者客樂安爲張度西述其事度西作張鍋魁歌秦州仲
松嵐官蜀時亦有詩紀之

蘭溪孝子徐驪有巧思其俗設祭每刻楮作魚龍花鳥
置盆盎閒驪爲之工不與他人等鄉鄰報賽輒多得錢
市肥鮮以奉母已常蔬食母疾禱於神剖左股和藥以

進母歿葬費墮山下廬墓三年嘗掘地作潭汲水人稱
爲孝子潭驢曾祖母余年二十而寡攜子依母家以居
爲諸嫂執爨終歲勤苦未三十而僂偻如老婦兒年十
三復攜之以歸歲大祲哭曰天乎與兒俱死矣夜夢神
語之曰有雞可賣何泣爲詰朝視時桀無雞也見藉牀
草在門後試屈折之宛然雞也悟曰此豈可賣也復剪
紙爲冠距傅之翼命兒攜以適市人競取之一雞得三
錢母子藉以俱飽象山姜炳璋爲蘭溪院長作母有雞
詩云阿母飢飢兒嘸兒母嘸母有雞有雞無飢神告之
母青年貌若媪索雞不見雞乃見藉牀草屈草作雞形

翦紙翎與爪一雞三青蚨百雞一束橐雞乎雞乎飢母
飽母有曾孫其名曰驪三年藉草二親墓旁白日暗黃
壚雞聲號曉霜一門節與孝千秋揚其芳炳璋字石貞
號白巖

李南澗之弟文淵字靜叔以毀卒年止二十有六所著
論辨之文多有根據不苟同嘗言昌黎韓氏之說後人
陰祖而陽絀之如云性有三品而後云所以爲性者五
曰仁禮信義智蓋已分氣質理義而二之矣後人謂分
氣質禮義而言性自宋儒始何也呂東萊疑西銘爲兼
愛以其言一視同仁而未及篤近舉遠也然則原人一

篇兼西銘之旨而過之矣後人尊西銘而不及原人又
何也又言唐詩於本朝事每無所忌諱猶變雅之遺也
忠厚如宋而蘇子瞻猶以詩下獄至白樂天爲樂府諷
時政遂召入翰林唐詩所以不可及者豈獨字句之工
哉管絃若謂樂府古詞陳陳相因易於取厭張文昌王
仲初創爲新製文今意古言淺諷深頗合三百篇興觀
羣怨之旨樂天尤工此體至欲藉以感悟宸聰敷陳民
瘼其積愈厚故其言愈昌亦天地閒不可少之一種文
字也閨秀高景芳一等侯張宗仁室著有紅雪軒稿翰
租行云驢馱口袋牛挽車天陰防雨宜重遮農人惜米

如珠寶官府視米同泥沙不辭淋尖與加耗早賜收取
容歸家願存升斗買麤布聊與妻兒補破袴盡情傾倒
實堪憐羞澀反遭倉吏怒驅牛出城口吻乾無錢沽酒
驅風寒辛苦回家夜將半細嚼筐中草頭飯真樸如不
經意足當採風之獻得之中圭尤難彼但調弄涼露晚
煙微雲澹月數十字以爲詩者烏足以語此

文登陶易悔軒乾隆中以舉人知衡陽聽訟敏捷署後
有池一區久廢入民間損奉錢購歸仍以乞民養魚作
軒其上顏曰買池學使吳鴻頡雲以詩紀之同時知府
儻全通判席綺縣丞石文成清泉令江恂于九恂兄昱

賓谷皆能詩易二子曾履曾恆亦雅士歲節休暇弦歌
相聞韻雲買池軒詩有云碧添新漲水青入隔城山文
成桐城人乾隆二十一年分衡陽立清泉移縣丞駐查
江以詩人居閒官能暇於事爲詩靜淡沖和與悔軒于
九銜杯授簡一時稱盛其赴查江新任詩云萬疊青山
一權通人棲小署聽松風地偏只傍三家市仕隱何妨
一畝宮泛宅更來鷗影外放衙常在鳥聲中紛紛問字
門前客莫比前堂侍馬融長沙回望是并州十載飛鴻
雪爪留官久翻成強弩末途長空夢大刀頭每看蘭芷
生遙思欲采茱萸起暮愁七十二峰應好在秋風杖履

共誰游年來霜雪鬢邊添暫脫塵勞趣自恬四野稻花香撲座一階草色綠侵簾訟無鼠雀庭常靜市有魚鰕味可兼百里弦歌慙佐理敢將疲蹇託寬廉應少高軒
向此過閒拋手版任婆婆窗因蔽月思刪竹田爲當門
改種荷臥聽灘聲東去急坐看山色北來多平生結習
耽詩句不對雙松亦嘯歌又輓運入都回署詠懷詩有
矮屋竟成長住宅青山應笑再來人數椽略似蝸連殼
三載翻成鳥出籠之句文成爲丞十餘年凡三守平江
一守甯遠通道澈浦知縣又嘗聘修辰州府志及以卓
異薦入都每去皆不過一年仍回衡陽故視查江如其

家鄉人士視文成忘其爲官其守令純用文治平江號繁劇文成至則恆若無事或問之曰省事不如清心余無求故能然

任子田李鳳岡皆朱竹君弟子子田少年爲文選學旣乃專門考古淹通於禮與顧文子劉端臨賈稻孫李孝成皆江北經學家所著有弁服釋例深衣釋例釋縮小學鉤沈字林考逸吳越備史注王西莊序其詩集謂五古曲折微至而一種澹風遠響又入韋柳之室鳳岡一字畏吾龍溪人深於六書之學著有說文解字定本守廣州日上游方大倚用忽一夜避妻子手書乞退居都

下十年一日思返漳州復不告家人盡棄其業隻身南
下年八十二猶如壯夫登山必窮其顛初不拄杖著書
數十卷言天人事物之理姚石甫謂明世王龍溪講學
出入二氏今則李畏吾著書力通儒釋皆心學也石甫
登芝山謁道原堂詩北溪東湖已後死配食衣冠肅堂
址煙樓撞破又何人前龍溪王今有李感懷雜詩云撒
手懸崖李廣州功名家世盡浮漚紛紛講道爭朱陸不
及青山自在游

丁龍泓三子健字誠叔傳字希曾佺字致堯詩皆附硯
林集後筆飲者梁山舟以毛穎染墨後一經燥枯便不

適用爲出新意採錫方二寸餘高如之面設四穿大小各二以受卓筆中容水數合使得上潤毛穎不至漸濡而止名曰筆飲山舟自造銘以寵之海鹽張芑堂爲鐫其側希曾因作長歌以落成之致堯復次其韻有句云汝本中山被褐夫未醉五斗詠雲裾一從被澤入中書如下籍句上籍臚今賜水田宅一區不須營謀噉不吐脫帽露頂任歡娛侯賜恩澤頭銜除蘇林注叔孫通傳上傳語告下爲臚下告上爲句齊桓謀伐莒口吐而不噉造語頗爲新雋希曾著有三代姓原嘗言西洋吉貝花肉厚子少移栽中土則衣被之利廣乾隆辛亥鎮海

樓災希曾謂他時重建製大自鳴鐘于其上使城中十萬家皆知晷刻蚤晏之節當時謂其好作奇論今則洋棉多植于內地夷場多于高處製大時辰鐘固有行之者矣希曾幕游閩粵吳楚嘗佐李雨村督學于粵東

梁諫菴爲山舟學士嗣子清門高蔭日事溫雝所著有史記志疑三十六卷元號略四卷人表攷九卷誌銘廣例二卷呂子按補二卷警記七卷蛻稿四卷分居杭城之塔兒巷山舟書清白堂額畀之因自號清白士其寄弟處素書云後漢襄陽樊氏顯重當時其子孫雖無名德盛位世世作書生門戶吾仰之慕之願與弟共勉之

其風尙如此年七十六卒節巾之先凡後事皆一一手
疏無纖毫遺漏家人屏當書几于硯匣下得二絕句云
性耽古籍閉柴衡硯北低頭過一生數十卷書心力瘁
妍媸留與後人評回首年華風轉蓬兩親逝後夢難通
今朝尋到棲神處可在眞靈位業中洵了然於生死之
際者矣處素號夬菴精左氏學成書者補釋一門

何春渚題汪水雲集後云舉目河山事已非空宮月黑
冷螢飛何人爲墮新亭淚只有錢唐老布衣一曲泠泠
旅夜琴坐中紅粉最知音休疑博取昭儀愛恐是漸離
擊筑心其客濟南泛明湖句云紅蘭漸出蘆中舫碧瓦

微遮柳外亭亦佳

余秋室學士乾隆丙戌進士以修書內徵由候選知縣授編修洊歷華資一典蜀試後以大考左遷出主大梁講席者甚久道光壬午重宴鹿鳴賞還原秩少習繪事叢蘭幽篠花鳥蟲魚無不擅長閒畫馬及佛維摩像尤善爲仕女圖光緒丁未有出其對鏡美人屬題者爲賦臺城路一闕云流光早被嬋娟誤春明夢痕休憶淺黛初勻圓冰乍拭多少傷春情思同時姊妹祇鍼綫慵拈錦袍先賜除了菱花誰知道人憔悴年來烏篷載酒聽秦淮夜雨滴將愁碎平視難禁微明自照一樣飄零身

世玉臺獨倚渾不稱江南舊時佳麗勳業頻看鬢華青
鏡裏時久客陶齋尙書幕中耳目所接多不慊於心者
不自知其詞旨之悽戾也

船遇橫風張帆經緯而行謂之折搶此技惟江船能之
卽庾闡揚都賦所謂艇子搶風是也搶去聲張雲璈仲
雅有搶風行

趙誠夫一號勿藥爲功干徵君子撰水經注釋四十卷
朱箋刊誤十二卷東潛詩稿十六卷以所居爲褚文忠
公故里取坊巷一切之見于圖籍者成褚塘閭史其集
中署名曰瓊花街散人曰蘭風賣魚師曰東潛村民曰

虞樂生家有春草園池館之勝甲于杭郡祖母朱氏爲
山陰祁忠敏公外孫小山堂藏書數萬卷祁氏澹生堂
所儲大半歸之生平博極羣書而羈旅奔走老尙依人
蓋功干晚年爲人所負家事稍落也九月三日辰州作
云萬里經行日家書到亦難自憐雙鬢改不敢鏡中看
酒盡愁方覺燈迴夢亦殘雁歸知有候強把客心寬發
聚落城至大同車中感述云悠悠沙塞與雲平走徧崎
嶇感客情西望欣逢達速嶺東來怕指去留城燈花黯
淡愁難結鐸語卽當夢不成多謝封姨少憐念暫回狂
馭眼澄清清明病中寄懷次公云連袂春游去鬪歌獻

癡柰此病夫何靜憐語燕分明甚愁較飛花落拓多自
課園丁閒插柳欣看稚子戲飛堦行人忽憶添惆悵曉
夜嚴程寂寂過

閒適之作讀之可以蠲忿馬思贊寒中插花山居同弟
寒將作云未必桃源便弗如此鄉洵美是吾居衣冠俗
儉風猶古耕鑿人多力有餘繞屋定栽千个竹幾家同
種一池魚近來長算村翁富賣與山田得買書濃雲暖
雨互悠悠寒食前頭社後頭兩月筍膏充肉味一年茶
事算春收烏當久坐聲逾美花到無名種最幽料理茶
鑪兼酒椀獨尋萱草對忘憂最愛西風換夾衣一番秋

色到柴扉不除衰草留蟲語但掃空階候葉飛帶角未
妨菱稍貴然其或恐豆旋稀直愁惱亂比鄰意珍重兒
童喚鴨歸杭童浦甲子書懷云衡門兩版短差肩喜值
唐堯甲子年傍郭漸忘山遠近入春整共酒留連投閒
轉愛生涯拙開卷常誇樂事偏兩便下帷晴出市頭銜
新署地行仙簇簇梅梢凍未醒二分春在謝家庭娛親
計日營兼味課子隨人占一經賦稿每依藩溷改婦言
試踞龜觚聽近來苦被詩人識寫我癡頑上畫屏元亭
劣可隱雙趺漢聖經神任世呼悶卽捉棊招橘叟痒思
搔背倩麻姑春游尙鼓連朝興詩債先償隔歲逋所學

問渠何可信略知止足稱潛夫浣筆猶堪頌太平更饒
頌健荷天生投鄰看竹頻驚座借寺緡經偶出城好事
傳來疑失實新知過後恐忘名祇慙飽食無他補長代
三農祝雨晴龜堂近體詩不是過也

海甯周勤補孝廉廣業號耕崖篤嗜典籍著有讀易纂
略讀相臺五經隨筆經史避名彙考季漢官爵考馬總
意林補注諸書其上陳閩野先生云物外身閒鶴不如
閉關手著異人書衣冠江左推前輩花竹城南稱隱居
煙菴翠微春命酒風腥海錯夜燔魚元亨景色知依舊
自愧塵勞問字疏

魏春松侍御成憲詩極研鍊年十三從其尊人秋浦翁
游塘西有句云玲瓏橘樹層層岸宛轉菱歌處處聲高
石生太守極爲歎賞甲辰成進士由比部出守揚州歷
江安充浙觀察使羅兩峰爲畫官舫侍膳圖桂未谷爲
分書題端以乞養歸復入爲戶曹進山東道御史數上
書言事歸主紫陽講席數年舟次曲江題家書後云每
日扁舟向翠微鷓鴣相喚燕交飛春從薄暖輕寒過人
自三楓五渡歸西笑底須愁素米南禪曾此話傳衣預
思樓筍登廡後到及林園綠正肥丁龍泓貝葉經歌凡
七易稿與經同弄靈隱寺之借秋閣後爲張芑堂所得

以贈春松因裝池成卷仍藏諸閣留爲山中故事有詩
紀之云世人言詩太鹵莽操觚率爾鐘撞莛張生手持
蟲殘本謂如初寫傳黃庭一回拈出一新義幅幅點竄
思通雲其持論深得班孟堅急趨無善步之旨昔人詩
文固未有容易成篇者佳句如白雲寺云海色浮雲外
山門盡日間題韓桂舫聽雨圖云天性無如兄弟好人
生半在別離中皆見工力

沈景熊嵩門有寄取軒詩鈔其鄰稀屋似孤懸磬土瘠
廚存最晚杭宰貴州印江時作也

沈匏尊大令心醇游于覃溪笥河兩先生之門精金石

考證之學有三硯齋集劄齋詩鈔陳伯恭庶常寓齋觀
唐元宗泰山摩崖銘拓本云開元邁前列亦識爲君難
龜勉十數歲國祚磐石安侈心偶一萌外內生宄姦云
何見侈心紀功封泰山余昔滯山左策杖擬縱觀吾家
賢太守心齋族伯借我捫天關懸崖若斧劈峭壁如鑽刃聳
拔十萬仞糾結藤蘿攀深刻一千字飛舞蛟螭蟠緬維
前代史對之增慨歎君王好神武尤欲工文翰經營窮
四極借曰圖民艱張說喻此意倡議博聖歡集賢定儀
注肅肅文武班時維仲冬月想見山風寒綺羅隘大路
金翠屯軒闌小民困庸調卒歲不得閒司農非省斂天

子求神仙鸞旗雜綵憶虎韞跨雕鞍陋秦祠五時式漢
崇三壇隨班協律尉逐隊清要官異方貢珍玩一一天
府頒當年季秋詔禁絕符瑞繁如何僅隔月反汗違前
言兩事史竝書美惡不得刪漁陽在疏忽侈志開其端
銘辭雖惕厲未必山靈然峰高目力短不辨波勒攢太
守有揚本出之行笥間據云架飛木工藉人力牽殷勤
施膠墨瓊蠟愁暎乾有時風裂紙片片同蜚鳶揚此尙
不易鐫者手足胼文多迹纘緒筆法晉魏先中有漫漶
迹百餘字損殘古人不可見古蹟從流傳回頭告太守
國賴宰輔賢當時姚宋在知必無此篇忽忽四五載役

役翰墨緣商邱陳太史好古搜遺編酒酣話舊事心往
日觀巔唾壺已擊碎胡琴終無絃讀書羨古人文字觀
其全太史忽出此寶之同璣璇披尋剝蝕處一笑波捺
完元美辨石泐竹垞窮燒瘢俱見王朱公文集豈有神物護不
然隨風煙遠或宋元揚近亦三百年社首卑附地泰岱
高摩天至今行道者孰肯伫足看茫茫前代業祇此留
人寰君王崇令德亘古民心鑄所以封禪書感慨司馬
遷匏尊生當裕陵全盛之時極熾而豐憂盛危明足見
忠愛非尋常金石詩也其同人登陶然亭句云襟被經
年滯帝鄉每于臨眺發詩狂當時必有以不狂爲狂者

十全之大武方成三省之教匪已起其古意詩有云眾
聲若飛蠅酒食濁其性羣鷄我影孤沈沈良夜孟識曲
聽真繫何人哉遠宰蠻縣名亦不顯故特爲表而出之
比之珠林一葉

李能白早發欒城云晨裝發欒城月影在馬首疏星漸
沈河行雲半銜斗鈴馱時一聲不辨前與後曙色久始
分蒼茫見林阜清霜晚來重微白上衰柳回首臥龍岡
冒寒更前走癸巳冬歸自尤溪由東道入都趨程早發
讀抱琴草堂此詩寫景宛然非畫手所能到

乾隆閒臨平漁者網得文信國綠端蟬腹硯於鼎湖銘

日洮河石碧如血千年不死甚宏骨歎識皋羽二字其
文曰文山攀髯之明年疊山流寓臨安得此遺硯焉金
友白鼓村詩文山之遺疊山得誰其銘者晞髮生

誠夫小詩極有風韻擬秦淮雜詩四首云春情何處遣
銷魂白版橋頭綠水村二十四航龍藏浦花城夾岸竹
籬門清溪曲曲木蘭舟迤邐連岡接石頭初試夕涼歌
最苦子弦新撥一聲秋誰家水榭倚紅闌陣陣春風燕
子寒去問坊名猶近古大長干外小長干沈香甲煎酒
初醒十二珠簾雲母屏若使一生花底活不辭天下作

郵亭

王百穀號
天下郵亭

其十四夜觀鐙城北鐙事都闌興盡歸

來作詩自遣云忽聽喧呼小市前魚龍雜隊戲褊褊雲
留淡月過元夜人蹋殘鐙又一年北郭故家春寂寂南
湖荒市草芊芊繁華夢幻知多少獨對寒牕且放眠有
感於田居侍御西厓少宰舊宅皆已易主也

吳尺鳧居在杭城薦橋厲太鴻詩所謂詩人家在薦橋
街者也有古藤一本構亭曰繡谷自號繡谷老人雅好
聚書手自勘定瓶花齋所藏與汪魚亭振綺堂埒所輯
熏習錄則記其精鈔祕冊也子誠號甌亭搜求其所未
備乾隆間詔徵遺書兩家皆進善本蒙賜內府書籍孫
爲金字篆青中麟號佛川耽書嗜吟善承世業佛川自

鹽官復至清溪云兩度吳羌纔十日門前不減綠溪光
輕艫繫處低徊久秋樹如人立夕陽錢唐諸生王德溥
容夫養素園藏書亦多古槧新羅山人華秋岳見所作
鵝詩翻身穿翠苻側翅拂清波之句爲作浴鵝圖

沈南雷儀曹世煒爲椒園先生令子書似平原尤耽吟
詠再過郎岱恭朗軒司馬招飲夢魚亭卽席率賦云薇
省相親憶昔年重教兩度續前緣茅亭小築依苔徑山
雨初來響石泉萬里征塵銅鼓外一尊鄉思鏡湖邊多
君念舊情彌切欲別重留憶悵然子守正字莊士幼爲
大父愛賞嘗云吾家衣鉢當付此子十齡作綠梅諸詩

附刻隱拙齋續集中私淑姚江之學厭城市遷居德清
城山集曰不遠復齋高郵道中云濃淡雲容頃刻非雨
絲絲裏日光微黏天壁社湖中水坐看風帆葉葉飛
蔣山堂行楷書彭尺木推爲當代第一郭頻伽論書詩
有頻羅早達吉羅窮一首山堂自號吉羅居士原名泰
後得古銅印文曰太平之人遂易名仁嘗客雨窗運使
阿林保署中偶爲書蘇詩有白髮蒼顏五十三句遂以
病辭歸歿時適符其數

許甯基右榭遺稿陳橋驛詩云颿借微風到岸遲陳橋
十里落陰時恩恩王業談何易兩兩孤兒失亦奇天子

豈教人逼迫史臣莫道帝驚疑袖中禪詔何時草擬問
陶公子細知婉而多風詩筆極爲可喜右樹從曾祖時
齋宗伯汝霖祖德培孝廉惟植父晚榆刺史勉燉兄霍
齋戶部道基子詠曾大令華鐘皆嫺吟事海甯之以詩
世其家者也霍齋一號竹人爲陳曼生外祖時齋宗伯
孫復齋副貢承祖構別業於西湖巾子峰下郡王廟西
顏曰雪莊自號雪莊居士金冬心爲書榜中有師白堂
鏡湖樓復齋寶雲精舍竹笑軒待月廊雪舫歲時扣舷
蠟展卽事拈題成七言絕句三百六十五首篇各有題
題各有注乾隆丁丑 玉軼省方手錄進呈特拜文綺

之賜以視董靜傳楊蟠郭祥正西湖百詠不覺突過前賢

乾隆五十七年餘姚盧槃齋學士重游泮宮有紀事詩四首學士於雍正壬子年十六應童子試受知於安溪李立侯學使列仁和學博士弟子員時縣試几席皆用錢貨錢多者擇縣堂寬敞處高坐錢少者則僻處于兩廊室皆黑暗聚蚊之地故有白鳥青蚨之句生平博究經史自少至老手書不輟尤精拔勘擇要刊爲抱經堂叢書其不能盡版行者錄爲羣書拾補自著有儀禮注疏詳校鍾山札記龍城札記諸書詩曰磯漁詩稿酬張

丈東扶讀金石錄見貽之作云湯盤禹鼎古有器今其在者祇文字世閒何物最堅牢金石猶然遭失墜固知古人絕愛名亦望後人能好事幾番風雨逃劫灰年經月緯分部次誰云歐九欠讀書集古足以徵傳記後來更得趙湖州復喜閨中有同志芸籤縹帶二千軸手自摩挲誇博識北狩空悲易水寒

易安詩南來尙覺吳江冷北狩應悲易水寒

恤緯遺嫠獨憔悴零星故紙重天球一想前塵一垂淚在處若有神物護傳寫人間矜枕祕雅雨山人夙嗜古爲屬校雠辨同異易安晚節負奇冤奮筆平反頗快意來詩亦復相印可名教千金敦氣誼更有左證君知否

慷慨詩篇投遠使，婆家父祖並高名。信息鄉關重誣諉。

是時紹興歲在丑年五十三，何所冀。紹興癸丑韓肖胄胡松年使金易安

送之以詩云：婆家父祖並高名，又云：只乞鄉關新信息。時年五十三，稱婆則不嫁，明矣。事當日久。

自分明巧，螻何人空作偽。可憐杞婦痛摧城，翻比談娘。

歌踢地。堅城自墮，憐杞婦之悲深。易安祭夫文也。偽作上綦學士啟中有云：局地叩天，敢效談娘之善。

訴雲煙已分爨，時空鱗爪猶為來者。企文章要自以人。

重宵使無端，蒙謗議書尾。丁甯復垂誠，早識吾儕有同。

嗜見彈求鴟，未足嗤案圖。索驥那可致，插架新添三十。

卷已覺暴富，良不啻異寶。于今落誰手，君若得之煩見。

示此詩於易安居士，改嫁張汝舟之說，以年考之，不當。

有此事俞理初本此意取其事考合排次力辨其誣謂
易安以美秀之才好論文以中人忌宋方擾離不糾言
妖大可爲詞女吐氣其引劉時舉通鑑云紹興四年八
月趙鼎疏言草澤行伍求張浚不遂者人人投牒醜詆
及其母妻四朝聞見錄有劾朱文公閨闔中穢事及朱
謝罪表蓋其時風氣如此近來小人言語尤無顧藉鄙
惡荒誕莫可究詰誠亡國之妖孽也

明趙定字檢討用賢及編修吳中行劾張江陵奪情廷
杖放歸許豫甯庶子國鐫杯二玉以贈吳兕以贈趙贈
趙者後爲曲阜顏氏所藏翁覃溪視學西江爲檢討五

世孫者庭明府王槐致書顏衡齋崇槩乞歸故物作咒
觥歸趙歌法時帆阮文達均有和詩定宇謚文毅豫甯
謚文穆錢竹汀詩白璧仍歸趙黃金欲鑄顏

明洪武閒惠山聽松菴僧性海編竹成鱸以煮茗王孟
端爲繪圖賦詩康熙年顧梁汾得於納蘭容若所復歸
諸菴乾隆辛未

高宗駐蹕惠山寺汲惠泉用竹鑪煎烹因和明人題者
韻卽書卷中丁丑壬午乙酉皆有御藻留題四十四年
無錫知縣邱漣以錦暉薦舊玉籤損折攜至署中欲重
裝值署西民居失火延燒失于防護孟端卷及履菴一

卷吳琨一卷張松岑補圖一卷均燬於火四卷旣被燬
巡撫楊魁布政吳壇自請議處並劾邱漣命罰銀二百
兩給寺僧 御筆補寫首卷命皇太子永瑔及宏旰董
誥分畫二三四卷并令補寫前人題詠仍付山寺收弄
復取孟端溪山漁隱圖償之有紀事詩咸豐十年無錫
城陷諸卷散失同治二年秦緡業得御筆圖卷於上海
時城復庵址僅存明年卽惠山寺地建湘淮昭忠祠而
竹鑪山房高宗南
巡賜額遂不可復問矣又數載秦恩延得
漁隱卷於洞庭山人家會黃埠墩僧舍落成併付住持
華翼綸卷首有 御題頓還舊觀四字

舒穆魯伯容相國爲文定公孫雍正庚戌以中書入南
書房預辦機密軍機處初立與兆文襄同爲章京乾隆
初由御史洵擢尙書爲軍機大臣金川之役以參贊加
太子太保己卯平定回部繪象紫光閣辛卯土爾扈特
汗渥巴錫等全部歸順往伊犁經理撫輯癸巳還朝甲
午秋壽張奸民王倫假邪教糾眾作亂侵掠壽張陽穀
堂邑三縣地据臨清舊城以大學士赴山東禽勦至則
破臨清王倫自焚死凡六日而蕝事 賜御用貂尾冠
黑狐褂予世職四十二年夏扈從易州邁疾卒謚文襄
恪僖公舒常其冢子也字石亭丙申平定兩金川文襄

以運籌帷幄再與功臣圖贊名第四恪僖以參贊名第十父子並列尤爲雲臺凌煙所未有陸耳山篁村集贈權江西巡撫舒大司空詩廿年東閣舊郎君旌節新移清海軍功業西平真有子交游東野願爲雲仵歸溫室行聽履長威邴連築象墳草草江干枉車騎還將苦語出臨分文襄嘗受業於汪文端見恪僖贈文端子時齋

詩注

阮文達在浙所爲靈隱書藏收弄法悟明存素堂詩集劉醇甫題卷後兼示乙山中翰云詩龕舊主人結想山水曠迢迢西涯社落落東林藏遂令明聖湖忽施莊嚴

相再緣來者塗一補生時障妙借詩喻禪指示津所尙
挂角尋羚羊渡河出香象蘇齋真導師棒喝等提唱長
懸龕中鐙廣布席閒丈鯨鏗固有因獅座正無量無隱
木犀香斯言儻元暘梧門本生父秀峰孝廉廣順受業
於蘇齋故得稱門人蘇齋稱其刻意爲詩又博稽掌故
其於詩也多蓄古今人集閱覽彊記而專爲陶韋體故
以詩龕自題書室又以陶廬爲號其於典籍卷軸每有
見聞必著於錄手不工書而記錄之富什倍於人在諸
學侶中論詩最久其英特之思超悟之味有過於謝蘊
山馮魚山而詣力之深邃則稍遜之梧門本名運昌以

與關壯繆字音相近 詔改今名國語奮勉也蒙烏吉
氏隸內府包衣高祖名孟成內務府郎中內府俗例取
一字爲姓故又稱孟氏蘇齋序陶廬雜錄謂姓孟氏非
也奉旨爲伍堯氏故世稱伍堯祭酒所著詩話未刊例
言見存素堂文集所居在厚載門北嘗爲李文正年譜
自署小西涯居士辛忠敏詩文世無行本梧門採自永
樂大典各體俱備奏議散見於各韻世傳美芹十論卽
在其中詞多汲古閣刻所遺嘉慶中萬載辛啟泰敬甫
鐫版於江西梧門爲之序莫子偲乃謂敬甫綴拾爲之
亦誤

輔國公裕瑞豫通親王裔通西番語有思元齋集文二
卷曰棗窗文稿論史事者十居七八楊才叔序之詩四
卷曰萋香軒唵草潤圃居士豐紳殷德序之曰樊學齋
詩集小西涯居士序之曰清豔堂近稿紀文達序成誤
菴吳山尊各一跋劉文清題詩二首曰草檐卽山集臨
川樂鈞序之賦一卷紀文達序吳蘭雪徐星伯各一跋
刻梓精好諸家題跋並鉤摹筆迹如新脫手文清句云
皇都攬勝無窮盡不待江山遠問奇蓋以其生長朱門
未嘗爲遠游以壯詩思爲惜也誤菴跋云王荆公言唐
人學老杜而得其藩籬者唯義山一人朱少章云山谷

以崑體工夫而造老杜渾成之地陳后山云東坡詩初學劉賓客晚乃學李太白數公詩淵源有自乃無一語相蹈襲所謂遺貌取神者也樊學齋出近作相示其自述云律詩偶學李商隱古體微窺蘇子瞻蓋自道其得力如此而無掃捨之迹刻畫之痕可謂善自變化以達於古人者誤菴侍郎名成書穆爾察氏乾隆四十九年進士有多歲堂集及古詩選其曾孫鐵良嘗以見詒

煦齋相國乾隆戊申受業於湖南蕭雲巢孝廉大經辛亥以手書詩冊寄雲巢時年二十有一詩如與菊溪侍御夜話讀蘭巖少詹春怡齋詩草爲題二律和竹樵家

况晨起偶書韻題李蘇菴廷評東堂片玉圖題孫勉亭
著色牡丹恭蘭巖少詹許惠詩畫久不見詒詩以速之

次答百菊溪侍御不寐之作神木行

序云東便門外黃木廠有巨木長六

十尺相傳永樂建北京時自南方舉致因不中規矩故棄置于此癸亥戊寅兩邀御製詩章近又置祠歲祭子

偶道經土人指以告曰

此神木也因作神木行法時帆學士招同長河看荷未

赴限韻索詩有懷雲巢夫子陸璞堂學士以詩見惠賦

謝贈瑛夢禪居士爲初頤園給諫題種松書屋圖江秋

史侍御過訪留飲賦贈爲王伴梅秀才題乘風破浪圖

徐鏡秋太史改官荆溪詩以送之夏夜聞蟲喜雨西郊

遇雪雪後海淀道中雖皆少作風格已成故嘗從任子

田大椿學詩也相國索綽絡氏隸內府所著石氏受姓源流紀略云高祖都圖爲御前親隨

聖祖嘉其身健如石賜姓石氏曾祖石琦因石爲族祖明德有顯菴詩鈔從祖富甯有東溪詩鈔永甯有東村詩鈔辛卯生於粵東撫署別號粵溪生幼名石桐字樹琴嘉慶己未五月由少詹升詹事僅十日晉閣學 召對諭云汝家事朕皆深悉惟當日和坤如何欲與汝締婚汝父何言以對其直陳無隱對曰臣年八歲時和坤初爲侍郎至臣家適遇臣於門外但問臣年幾何別無他語及臣十一歲一日臣父退直謂臣母曰白髮夫妻

日增老境當早爲兒授室今日在公所見八旗秀女中有原任漕督阿思哈之女薩克達氏未經記名可卽通媒灼併定於十三歲來歸此外別無所聞迨臣父亡後大學士公阿桂向臣言當日和珅倩內務府大臣金簡爲和珅之女作伐臣父婉辭阿桂稔知其事

仁廟嘉歎久之諭曰汝父生前受和珅之謗多矣因泣對曰不獨生前受謗身後遺摺尙爲遏抑次日特賜文莊謚並及其世父文恭謚詳恩福堂年譜

恩福堂筆記余幼時字臨多寶塔及冠檢先人書篋中得松雪與子英學士手札墨迹遂日日仿之是爲學趙

之始後列諸城文清公門

文清爲煦齋王子鄉
試癸丑會試座主

嘗領論

書餘緒又嘗侍公揮豪略窺作字用筆之道一日公出
趙迹二贊二圖詩大字卷董華亭所稱以魯公送明遠
序兼米海岳法者示觀余愛不釋手公卽慨贈有一生
學之不盡聊當衣鉢之語余拜受歸因名書舍曰藏松
于克襄稱其晚年兼以歐柳自成一家先曾祖丹崖公
自山東督糧道解組後居丙舍取彭澤歸來之意自名
其室曰來室煦齋爲書額署款齊叟英和則道光辛卯
由卜魁賜環以後作也焦里堂爲煦齋辛酉江南所取
士嘗爲序雕菰樓易學且集蘇文忠句贈之曰手植數

松今偃蓋夢吞三畫舊通靈

毛西河姬人曼珠豐臺花匠女也煦齋先生豐臺看芍藥詩欲折將離比顏色花容得似曼珠無宋于廷有題曼珠水墨荷花摸魚子詞

徐星伯卜魁城賦跋云國家撫有六合盡海隅出日咸入版籍康熙乾隆中屢測星度刊定輿圖於是積學之士閉戶著書能知宇宙之大又恭讀

高宗純皇帝聖製盛京賦流天苞以闡地符一時名公鉅卿如周海山先生使琉球作中山賦紀曉嵐先生謫西域作烏魯木齊賦和泰菴先生鎮衛藏作西藏賦獨

黑龍江界在東北邊曩惟方恪敏公有卜魁雜詩及竹
枝之作而研都鍊京天則留待我樹琴夫子發摠文章
爲封疆增色升高能賦山川能說兼此二難是足以垂
不朽矣按記載黑龍江故實之書齊叟此賦而外鄂文
端曾孫西清研齋撰有外記八卷袁爽秋太常備兵鳩
江嘗爲刊行並刻薩英額吉夫所撰吉林外紀十卷太
常謂研齋之書第二卷述城堡有云石晉末胡嶠陷遼
爲蕭翰掌書記居福州宋徽欽二宗入金居五國城以
地理考之福州五國城應在今黑龍江城境內余於光
緒初傳鈔此書卽知此說之謬比疑此城近會甯府當

在吉林烏喇甯古塔之間終不能確指爲今何地後乃知乾隆閒有副都統綽克託築吉林伯都訥城得紫檀篋中藏宋徽宗畫鷹一軸墨蹟如新並得古銅盃器多端又有碑碣錄徽宗晚年日記於天會十三年寄跡於此曾經數載考宋史徽欽二宗入金初徙韓州後移冷山皆不出今吉林內地終徙五國城故址卽今伯都訥城汲修主人曾載諸嘯亭雜錄潁川逸士亦載諸東省記聞雖互有詳略而證據無殊今吉夫之書第二卷記阿勒楚哈城城南二里有金顯祖建都故城俗稱白城有謂爲五國城者誤第九卷古蹟三姓條五國部下據

遼史營衛部族志考得五國頭城之名亦爲詳核蓋五國城古名五國頭城亦曰五國城頭當時並設節度使領之又吉夫於五國部下徵引宋金諸史及元明一統志洪忠宣松漠紀聞并近代高士奇扈從錄等書參考五國城故址所在均未合蓋吉夫著此書時汲修主人及潁川逸士之書尙未行世雖能辨白城爲五國城之誤而又以爲在三姓無疑終曰俟後之博覽君子尙不失古人著書慎重之體

乾隆乙酉巡幸江南高郵王石臞先生以大臣子迎鑾獻頌冊賜舉人乙未成進士改庶吉士辛丑散館以部

屬用嘉慶四年正月

高宗升遐時官吏科掌印給事中密疏劾大學士公和
珅贖貨攬權卽日奉 旨明罰勅法政府肅清天下稱
誦少從休甯戴東原授經精審於聲音文字訓詁之學
分顧亭林古韻十部爲二十部而於支脂之三部之分
辨之尤力以爲界限莫嚴於此與金壇段懋堂暗合而
分至祭盍緝四部則又段氏之所未及注釋廣雅日以
三字爲率十年而成書凡二十二卷名曰廣雅疏證尤
善以古音求古義旁推交通學者比諸酈道元之注水
經注優於經段懋堂謂讀疏證如入武陵桃源取徑幽

深而其中曠朗講明經義不取鑿空之談亦不爲株守
之見惟其義之平允而已子伯申尙書錄於經義述聞
及經傳釋詞中三任河道旣罷職就養京寓取舊所校
惟南子內篇重加訂正由是校戰國策史記管子晏子
春秋荀子逸周書及舊所校漢書墨子附以漢隸拾遺
凡十種八十二卷名曰讀書雜誌道光五年重與鹿鳴
宴賦紀恩詩六章十二年卒年八十有九嘗謂古體詩
當以漢魏六朝爲宗下逮有唐諸大家以正所趨近體
則唐稱極盛而中晚氣格漸弱已無足法有宋以後古
近體皆可涉獵當知其佳處得力於唐人而新其壁壘

不可轉襲宋人之貌世徒瞠明代七子規仿盛唐爲優
孟衣冠而不知去唐學宋又出七子之下至古體用韻
當依唐韻部分無若填詞家信筆出入也

武虛谷庚子進士五十六年令博山在官七月步軍統
領番役入境滋事按法撻之番役例禁出京畿時和坤
勢張甚大吏承望風旨隱其實假濫刑平民被劾去嘉
慶四年十月卒是冬有察舉廉節之詔名在召用中先
歿已一月矣生平直諒多聞著有羣經義證經讀考異
三禮義證諸書尤精于金石學嘗客小滄浪助阮文達
輯山左金石志桂未谷贈以詩云一行作吏早歸田金

石遺文出鄭箋來往雒華秋色裏逢人但乞打碑錢孫
季述所作虛谷傳論謂墨吏負帑愈多去之愈有所牽
掣強項吏一出而被劾且以沽名相詬嫉李晴山送別
白秋齋游擊雲上詩云時時期與物有濟處處難爲人
所容獲上信民蓋自來判爲二事也

乾隆辛亥余伯扶鵬年主重華書院時翁覃溪以閣學
視學山東來試曹州偶語及曹州牡丹曰何不譜以述
之接試宅府復緘詩至曰洛陽花要訂平生伯扶乃集
弟子之知花事園丁之老於栽花者偕之訪花勘視而
筆記之歸而質以傳記成曹州牡丹譜一卷次第其色

爲三十四種附記七則載栽接之法覃溪題三絕句云
玉璫如結黍苗陰壤物原關樹藝心何事思公樓下客
花評不向土圭尋細楷憑誰續洛陽影園空自寫姚黃
挑鐙爲爾添詩話西蜀陳州陸與張我來偏不值花時
省卻衙齋補謝詩乞得東州栽接法根深培護到繁枝
昔謝康樂謂永嘉水際竹間多牡丹蘇魏公謂山牡丹
者二月梗上生苗葉三月花根長五七尺近世人多貴
重欲其花之詭異皆秋冬移接培以壤土至春盛開其
狀百變宋鄞江周氏洛陽牡丹記自序求得唐李衛公
平泉花木記范尙書歐陽參政二譜范所述五十二品

可考者纔三十八歐述錢思公雙桂樓下小屏中所錄
九十餘種但言其略因以耳目所聞見及近世所出新
花參按三賢譜記凡百餘品陸放翁在蜀天彭爲花品
云皆買自洛中僧仲林越中花品絕麗者纔三十二唯
李英吳中花品皆出洛陽花品之外張邦基作陳州牡
丹記則以牛家縷金黃傲洛陽以所無薛鳳翔作亳州
牡丹史夏之臣作評上品有天香一圍萬花一品曹州
牡丹未審始於何時其散載於它品者曰曹州狀元紅
喬家西瓜瓢金玉交輝飛燕紅妝花紅平頭梅花紅忍
濟紅倚新妝等見伯扶自序

山東巡撫例貢牡丹
乾隆二十九年停止

呂寶愚通守士鈇古鏡句云潛光祇合終身斂世事多
應屢照疲除夕云愛聞已往無心過喜讀生平未見書
通守漢軍人官廣西隆勝通判有憶歸絕句云夢繞雲
山百感生歸舟屈指入千程故園風物難忘處短巷斜
陽賣餅聲歸田後與故人李三話舊云卻念別君初此
樹高及肋今來花出牆亭亭弄春色草木固多姿人生
歲月逼古意云甘言損夙業浮謗成高名百年歷艱難
乃爲天所成君子貴自我返視鮮不平秋雲薄太虛明
月當空明曠觀得大道迢然萬慮清亦吾鄉有道之士
也

何介亭景福卽事詩云風滿長林听釣臺奔雲如墨裏
輕雷一雙白鳥東飛急知是西山暮雨來

乾隆中詔徵遺書以浙江鮑士恭范懋柱汪啟淑兩淮
馬裕四家所進書多至六七百種各賜古今圖書集成
一部又進書百種以上之江蘇周厚堦蔣曾瑩浙江吳
玉墀孫仰曾汪汝璫及朝紳中黃登賢紀昀勵守謙汪
如藻等各賜初印佩文韻府一部所有進呈之書擇其
精本御製詩章題識簡端宋新安朱弁少章寓居汴水
使金被留追思汴都朝野舊聞條列爲一編大者君臣
事迹下及詩話文評皆足以資考證向有刊本併省爲

兩卷振綺堂所藏鈔本釐爲十卷汪汝璉進書凡二百餘種 高宗取是書題詩四首並以璵名登之天語其前二首云留金弗紀金閒事曲洧依然紀舊聞二帝播遷雖自取禍緣新法變更紛建隆端拱政堪徵紹聖宣和百事興設使子孫守祖制何愁萬世不繩承聖人之情見乎辭惜後來秉政者莫之能守也

湘鄉謝薌泉振定世所稱燒車御史也爲程魚門高弟有雲將小草在揚州時有酒痕紅到綠楊城句舊游禮邸爲言李西涯墓在長河北何太監墓側後法梧門訪得之在今大慧寺西三十步許太監墓在其旁與薌泉

所聞禮邱之言合蓋其地舊隸禮邱故老所傳不誣也
梧門與蕭崑田侍御芝募修墓碣祠宇薌泉爲敘其緣
起略云自古者家人墓大夫之職廢而邱隴兆域之禁
令度數茫然無爲之主者是以侵盜及枯骨而獄訟日
繁其或古墓爲田松柏爲薪啾啾然銜夜臺之泣者所
在皆是也文正茶陵人而世居於京師有子先卒故無
嗣五世皆葬畏吾村萬歷中宛平方公從哲封其墓我
朝廣濟金會公檢討有致王文簡書於文正墓三致意
焉並屬其轉告黃岡王吳廬今其墓地屬浮屠氏是宜
請於典土者而斂值爲之償以次封崇之表碣之更得

建祠屋三數閒庶幾好事者歲時蘋薦以妥鄉先生之
靈垂之永久其於文正相業言之亦頗委婉嘉慶庚申
宛平令武進胡遜捐俸贖墓田二十一畷於百祥菴僧
迺營葺墓道建祠三楹小屋二閒梧門記其始末揭之
祠壁張皋聞爲之書王惕甫則謂文正之卒初非無後
瓦缶漫記以墓碑槌碎攙鹽之事非事理大抵文正後
人式微故棄其祠墓萬歷中諸朝貴無繇物色因而爲
之埋掩棺和堯山堂外紀以謂兆先歿而公竟無嗣非
也適假得秦敦夫編修恩復所藏明弋陽汪文莊公俊
河閒李文康時所作李文正繼母麻太夫人九十壽言

一冊序作于嘉靖癸未距文正卒八九年文莊序載麻
太夫人諸孫有大理寺右寺副兆延尙寶司卿兆蕃工
部司務嘉敬三人其爲文正任子無疑因手摹以寄詩
龕並書於文正年譜後其西涯故居梧門定爲在德勝
橋西地名煤廠距梧門所居不數十武戊午六月九日
因公生日邀同人祀之并作長卷而薊泉爲之記西涯
則今之積水潭詳梧門所爲西涯考王琴德司寇詩淨
業寺北積水區柔藍一鑑浮鷗鳧相傳自昔西涯居題
西涯生日卷作也

博晰齋干叟宴紀恩詩恭和 御製元韻云令人新春

景物妍卿雲糾縵繞瓊筵義輪正值中天日堯朔重符
 大衍年五世仙源嘉慶集兩朝盛事賞恩延功成治定
 箕疇叶史冊從來孰比肩暖日晴風節序妍珠蘭玉祀
 設芳筵瑞逢虞帝呈圖世典重周王宴鎬年攜藻輝煌
 千載麗湛恩汪濊萬方延須知薄海原同慶屬國耆臣
 坐並肩朝鮮陪臣前議政李徽之年七十一法部聲容
禮曹判書姜士冕年七十三皆入宴
 極態娟獮羊文鹿列長筵温綸徧錫三千席異數親觴
 大耋年綵綺光華縑束縛雜錦綺以品爲階束以黃縑紫貂深厚貫
 聯延貂以品爲階黃絕貫之更憐老骨須鳩杖許傍煙霞倚瘦肩
 自慙衰質遜霜妍曠典欣逢拜綺筵得沐隆恩傳後嗣

曾聞仙律愧當年臣以戊寅充起居注官餘生事事

蒙亭育臣年來愆咎頻仍皆荷天恩宥釋寸念時時矢祝延日炫奎光

驚未定幾回濡墨聳雙肩是詩乾隆五十年乙巳作也

按千叟宴凡三舉康熙五十二年六旬萬壽三月壬寅

宴見任致仕給還原品文武漢大臣官員士庶等年九

十以上者三十三人八十以上者五百三十八人七十以

上者一千八百二十三人六十五以上者一千八百四

十六人於暢春園正門前是日擇諸王以下宗室子孫

二十歲以下十歲以上者六七十人執觴勸侑越三日

又宴滿蒙漢軍文武大臣官員護軍兵丁閒散人等年

九十以上者七人八十以上者一百九十二人七十以上者一千九十四人六十五以上者一千一十二人於暢春園正門前六十一年壬寅正月初二日宴滿蒙漢軍文武大臣官員及致仕退黜人員年六十歲以上者於乾清宮前越三日宴漢文武大臣官員等年六十五歲以上者王大臣則命諸皇子賜觴年未及歲之皇子皇孫命侍立觀禮 御製七言律一首命與宴諸臣賦詩紀事名曰千叟宴詩並勅爲圖以示後世乾隆乙巳高宗御極五十年復得元孫新正六日於乾清宮重循盛典宴席以品級班列凡八百筵預宴者三千人視康

熙閒千叟宴數逾三倍召官躋一品及年屆九十以上者至御座前手賜卮酒凡豐貂文錦按品頒賚 御製千叟宴恭依

聖祖原韻詩一章用柏梁體選百人聯句國子監司業銜鄧鍾岳福建人年百五歲遠來預宴尤爲耆英佳話嘉慶元年正月初四日於甯壽宮之皇極殿三舉耆筵預宴者三千五十六人賦詩三千餘首時高麗安南日本各藩使臣皆宴殿外列名邀賞而未入宴賦詩者五千餘人王述菴甯壽宮侍千叟宴恭紀云旭日曛隴照八埏欣逢壽愷布長筵霞杯春浥瓊霄露鶴髮香縈寶

篆煙擊壤謳歌盈大地承雲雅樂市鈞天久欽鉅典超
千古又合喬椿重引年壽宇宏開久道醅揆文奮武總
殊倫叢書祕檢羅淵府鑿齒雕題隸廣輪寶莢先春迴
六甲珠杓應候麗三辰何期解組歸田後重見瑤階慶
典頻星輝南斗映彤墀皓首麗眉共致詞碧落光華昭
復旦青郊豐稔樂榮祺十全文啟千祥集五福詩成萬
壽期皇極殿開崇極建箕疇敷錫鞶丕基解凍風來節
候回祥光淑景上樓臺笙鏞法曲凌霄起羽扇鸞儀映
日開繞屋雲仍五世列盈階琛賚萬方陪袞衣繡黼鑿
煙裏八表元臣晉壽杯九華宮殿列疑丞賚予便蕃拜

手承詩紀新正重肇慶器頌如意示嘉徵春鳩刻玉攜
雲杖彩鳳盤金簇錦綾天與皇家添勝景如花瑞雪上
衣校觀燈清淀備賡賜奏凱會叨宴紫光今值仙蓂開
四葉又看玉醴集千觴麟游鳳翥嘉祥協鼈禁螭坳麗
景長 聖壽九旬臣近八重來舞蹈綴駕行時述庵予
告家居奉勅召來京預宴而作也先太高祖資政公暨
五世從祖長史公均於乙巳與宴疊拜千叟宴詩如意
竹盤瓷碟綢緞朝珠壽杖皮張荷包皮盤等物之賜嘉
慶丙辰叔高祖芝亭公亦以內管領預宴尙老引年光
我家乘當時所賜 御筆千叟宴詩摹印本舊懸油漆

作家祠今與田園俱盡矣

王西莊以嘉慶二年十二月二日歿於蘇州王述菴聞
鳳階赴詩五湖煙水久棲遲歲在龍蛇竟不支無復對
牀同夜雨何由夢草向春池古文案定千秋業雜著編
成百卷垂誰識弟兄師友似人琴一慟九原知古文句
謂所著尙書後案雜著句謂其晚作蛾術編分說錄說
字說地說人說物說制說集說刻說通說系十門共九
十五卷與錢曉徵曹來應及述菴各有練川竹枝詞六
十首采綴故事出以風雅說者謂與鴛鴦湖權歌異曲
同工自福建試差還京以濫用驛馬被吏議左遷尋丁

內艱歸遂不復出嘗論次江左十二子詩及苔岑諸集
曉徵西泚光祿輓詩有文社廉夫評甲乙史編孫盛續
陽秋之句次句指所撰十七史商榷

海甯藏書家舊稱道古樓馬氏得樹樓查氏吳兔牀祖
籍休甯流寓尖山之陽值兩家遺書散布人間偶得其
殘帙每繫跋語以寄慨慕博綜好古勤於搜討與同邑
周松靄陳簡莊賞奇析疑獲一秘冊則共爲題識歌詩
以紀其事兼於吳門武林諸藏書家互相鈔校臨江鄉
魏小洲得蜀石經毛詩殘序爲摹副本並著攷異二卷
得宋槧百家注東坡先生集因名藏書處曰蘇閣錢曉

徵壽吳槎客七十詩所謂手摹離墨前朝字家有淳熙
善本書也乾隆乙未楊殿材農於雷雨後土中得雷斧
及古錢數十千皆趙宋時物賦瘞錢行紀事乙巳歲旱
太湖水涸土人於湖底掘得獨木舟一中有梁五銖鐵
錢三百餘千購得百餘特以數枚寄周耕厓都中爲賦
長歌陽羨吳菊畦處士曾爲作載詩圖嘉慶癸酉年八
十一下世次君蘇閣明經壽暘彙錄藏書跋尾爲拜經
樓題跋記五卷寒中初白二先生收藏之本無人搜輯
跋語以傳視二家爲無憾矣其和陳仲魚題宋淳祐臨
安志之作云鳳舞龍飛詎足誇錢唐遺事失宮娃天教

南渡支殘局人想東京續夢華朱鳥歌成空有淚冬青

種後已無家與君鼎足藏三志

子舊藏有乾道臨安志三卷咸淳臨安志九十

五卷皆宋刻及影鈔本合此爲臨安三志云

天水猶懸碧海涯

拜經樓所藏海昌閨秀詩有佟陳氏稿前有題云佟陳氏爲海昌次升封翁女大司空學山先生嫡妹未出閣時所作秀慧之致已見一班老荆之母姨也子初婚時偶爾手鈔及今展閱忽忽五十餘年若俛仰事戊申八月南屏時年七十有一兔牀書此後云次升名之暹崇禎丙子舉人學山其長子數永之號攷陳氏家譜次升凡五女第四女適三韓佟世南廣東瓊山令第五女名

院永字倫光適同邑楊中默有詩名著素賞樓集爲時
傳誦惜其姊能吟詠而人罕知者并名字亦無可攷豈
爲若妹所掩耶素賞樓集中閒有與姊倡和詩今年秋
武林魏小洲偶得此稿貽予因亟錄之首有戊申八月
南屏題字南屏亦未詳何人也乙巳臘月槎客誌案佟
世南字梅岑嘗與陸進張星耀同編東白堂詞選十五
卷四庫著錄所作長短句義錄入白山詞介其山花子
云芳信無由覓彩鸞人閒天上見應難瑤瑟暗縈珠淚
滿不堪彈枕上彩雲巫岫隔樓頭微雨杏花寒誰在暮
煙殘照裏倚闌干譚仲儀謂其不無天際輕陰之感梅

岑詞筆麗則閨中復得嘉耦棟鄂伍堯兩先生編錄熙朝雅頌集時乃未登其夫婦一字微免牀山人此記世竟無知有佟陳氏者亦可慨也

蔣韶年生於黃州郡署故別字臨臯世居寶坻有吏隱集詩鈔四卷子二長攸欽字約園次卽礪堂相國其尊人國祥累官長蘆鹽運使乾隆己未罷職歸旗以隨任之從子楷年就姍湖南遺漏未報謫戍軍臺臨臯陳情乞代戍格於例又以旗人不能隨侍兩次乞假省覲至癸亥始得往代適陵州盧雅雨在戍所親承指授肆力於詩迨後筮仕江南遷山東平度州知州退耕洵水之

陽緝次舊稿皆中年以後作也詩筆清約其過王陵母墓云劉項雌雄尙未分英彭智略軼人羣母非預識興亡數有子甯教事二君五十四年卒約園官雲南河陽縣典史亦能詩釣臺云拂袖歸來物外情那知隱後轉成名當年若問歸來意甘向漁磯寄此生天子何妨是故人桐江煙月樂吾真胥潮亦重先生節不遣衝波過富春戴南枝有嚴子陵釣臺三千首此固當以少勝多彌堂相國集曰繩榘齋乾隆癸卯鄉試出翁覃溪鴻臚之門甲辰成進士嘉慶三年由編修改御史五年觀察

吉南贛甯

仁宗嘗密諭巡撫張誠基曰蔣攸銛江右之良才也道光六年以大學士代琦善任江督十年以黃玉林案降補兵部左侍郎十月行抵山東平原縣卒於途次在軍

機曰

宣宗欲觀會試題名錄公卽默寫以進二百數十名其差者只一縣名耳此與宋張文定公綱記相國寺染簿略同皆一目十行之敏也夔州土枯瘠乏井泉之利不宜種植惟產柚獨佳郡守須以時饋柚及蟹歲耗千緡督四川時蠲除之嘗刻石州詩話於粵東節署又刻有友石齋帖錢東生詩合應一片羊公石勝得千金陸賈

裝覃谿晚年以文孫尙幼自訂翁氏家事略記以詒襄
平英煦齋從相國之子丐得付之梓

冷邨布衣瑞昌愛耽山水有操縵堂詩稿高蘭墅跋謂
其五古頗近韓柳七古略似長慶集中語五言絕七言
絕神韻脫續辦香應在鳳洲滄溟七子七言律亦圓潤
不落小婢面孔五言律前人論詩所謂木葉盡脫石氣
自青其庶幾乎雖一時朋好推挹之詞然如坐岫雲山
房懷城中諸友云煙霞方外物詩酒客中身盧師山雨
中立秋云寒生深樹裏秋到萬山中九日同張碧崖王
潞漁游薊門云青山千疊翠黃葉一林秋胸次固絕無

俗韻也蘭墅名鶚乾隆乙卯進士世所傳曹雪芹小說
蘭墅實卒成之與雪芹皆隸漢軍籍

江立玉屏爲于九太守從子有小齊雲館詩鈔詠並蒂
芍藥云十二雕闌一徑深將離作意倚同心膽瓶剪取
勤供佛應降西方共命禽雖得東皇寵最遲翻階日影
整相隨情如合德倍飛燕姊妹敲寒擁背時玉屏工詞
博物適市有紙縣厚數層連疊揭之成球旁無端縫人
皆不能識玉屏以爲古側理紙也言之鶴亭方伯春購
以進呈

高宗題詩于上命檢康熙時內庫曾有一幅

聖祖亦嘗製詩題之

雪橋詩話卷九

雪橋詩話卷九

癸卯
秋
齋